

諦閑法師  
講錄之一

普賢行願品輯要疏

上海佛學  
書局印  
行

中華民國二十一年七月初版  
中華民國二十二年三月再版

◎每冊定價大洋一角半

(外埠酌加郵費)

演講者 諦閑法師

膠州路七號電話三五五二四

校訂者 上海佛學書局

上海麥特赫司脫路四一四號

印刷者 天星久記印刷公司

電話第三萬二千四百〇四號

發行所 佛學書局

(一)上海威海路：麥特赫司脫路  
(二)上海開北：新民路國慶路  
(三)湖南長沙：玉泉街七十號

分銷處 各埠佛學書局  
佛經流通處

## 述輯要疏緣起

閑於前清光緒八年冬。首聽妙法蓮華經。至法師品時。心切慕之。本擬願終身奉持全經。定爲日課。頻慮經文廣多。未能每日諷誦。心切躊躇。時同學贈以古吳石刻梵本普賢行願品。初展讀。至又復是人。臨命終時。最後刹那。一切諸根悉皆散壞。一切眷屬悉皆遠離。一切威勢悉皆退失。如是一切無復相隨。唯有願王。不相捨離。於一切時。引導其前。一刹那中。卽得往生極樂世界。心切喜之。遂決意持此品爲日課。終身奉爲淨土指南。此本至今。寶之若璧。光陰迅速。忽忽已四十餘年矣。今年秋。杭州功德林經理。鍾君康侯。邀集諸同仁。組織講經會於城中菩提寺。乞講請觀音經。閑恐被機不溥。乃以病卻之。堅不肯行。後易講是經。遂欣然允可。復慮精神不敷。挈法子炳瑞副之。開經日。聽者若雲擁。竟無插足餘地。日常萬指圍繞。似覺津津有味。如飲醍醐。人皆讚歎歡喜。獲未曾有。豈非教在乘時也歟。自信持誦。不唐捐也。講畢

旋甬。一經月餘。每日持誦。覺得當時所講詞句。儼然猶在唇吻之間。至臘月初。乃取清涼疏。圭山鈔。首尾詳閱一過。始知當日所講者。若壘嶽之一塵耳。切惟疏太約。鈔過豐。至今又歷千餘年矣。時愈遠。而根愈鈍。人非昔比。所以久置高閣。閱者幾希。闕爲求豐約適宜。遂於十五日。拈毫起草。採摭疏中精要言詞。按科疏釋。經前添以當日所講之釋題。玄義。爲便初學。非敢謂以被時機也。乃命名爲輯要疏。如不以人廢言。未始非供養海中之一滴也。夫時維

民國十六年歲在丁卯臘月二十三日擱筆

釋諦閑述於四明觀宗寺之密藏居

# 大方廣佛華嚴經入不思議解脫境界普賢行願品輯要疏

四明觀宗寺台宗後學釋諦閑疏

釋此別行一品大科分二初總釋名題

## 大方廣佛華嚴經

舉凡釋經仰遵吾祖輒陳五義聊釋經題分二初總明五義分四

一標名。二生起。三引證。四通別。標名者。一人法兼喻。三事具足爲名。二一眞法界性具三千爲體。三十大願王導歸極樂爲宗。四拔衆生苦與佛果樂爲用。五圓頓大乘第一乳味爲教。相生起者。要悟眞理。須先知名。欲彰大教之功。乃立具足之號。故先釋名。使聞名以識體。如獲兔而忘罟。見月而亡指。故次顯體。雖明一眞之體。備顯性德圓融。不論妙行之宗。眞體無絲契會。故次明宗。自行曰宗。化他曰用。內行旣著。外用乃彰。故次論用。以四義爲指南。復須教相爲區別。故後判教。使偏圓不濫。時部甄分也。引證者。文云。善男子。如來功德。假使十方一切諸佛。經不可說不可說佛刹極微塵數劫。相續演說。不可窮盡。故以三事具足爲名。文云。虛空界盡。願王

乃盡。而虛空界不可盡。故我此願王亦無有盡。故以眞界性具爲體。文云。是人命終。最後剎那。世間一切無復相隨。唯此願王。不相捨離。於一切時。引導其前。一剎那中。卽得往生極樂世界。故以願王導歸爲宗。文云。若人誦此願王。諸佛菩薩之所稱讚。一切人天皆應禮敬供養。此人不久。當如普賢菩薩。速得成就微妙色身。具三十二大丈夫相。故以拔生與佛爲用。華嚴大經。是佛初說。如日初出。先照高山。又如從牛出乳。故以乳味爲教相。通別者。西天諸祖。東土人師。各伸佛經。俱造諸論。若釋題目。五章則通。又宗釋不同。大小殊異。若釋題目。五章則別。

二別明五義分五初釋名分三初釋經名二初合釋

## 大方廣佛華嚴經

合釋者。如清涼國師直釋七字云。極虛空之可量。體無邊涯。大也。竭滄海之可飲。法門無盡。方也。碎塵刹而可數。用無能測。廣也。離覺所覺。朗萬法之幽邃。佛也。芬敷萬行。榮耀衆德。華也。圓茲行德。飾彼十身。嚴也。貫攝玄妙。以成眞經之彩。經也。綜斯七字。爲一部之宏綱。則無盡法門。思過半矣。

二分釋二初釋別名二初簡定

一切諸經別名無量。舉要言之不外七種。一單人。二單法。三單喻。四人法。五人喻。六法喻。七人法喻。三事具足。單人如佛說阿彌陀等。單法如般若等。單喻如梵網等。人法如藥師如來本願功德等。人喻如菩薩瓔珞等。法喻如妙法蓮華等。三事具足如本經等。

三正釋二初釋大方廣

大以當體得名。離絕爲義。方以就相得名。常徧爲義。廣以從用得名。包博爲義。此三字直指吾人現前生佛同體之心性也。心性具無量德。受無量名。云何具無量德。謂性體、性量、性具。性體者。離四過。絕百非。體性堅凝。清淨無染。不生不滅。無古無今。性量者。豎窮三際。橫徧十方。世界有邊。虛空無邊。虛空有邊。心性無邊。現在有邊。過未無邊。過未有邊。心性無邊。無盡無量。無量性具者。具十法界也。舉凡十界。依正色心。假名實法。心性無不具也。欲令易解。作此三說。得意爲言。卽性具是性體。性量。性體離過絕非。性量豎窮橫徧。卽性具十界。離過絕非。豎窮橫徧。今言大者。指性體也。方者。指性量也。廣者。指性具也。性體卽中諦。性量卽真諦。性具卽俗諦。中諦統一切法。故言大。真諦泯一切法。故言方。俗諦立一切法。故言廣。性體卽心之體。大性量

卽心之相。大性具。卽心之用。大故知大方廣。直指吾人現前一念之體相用。乃天然之性德也。云何受無量名。此心性。或名空如來藏。或名不空如來藏。或名空不空如來藏。或名真如佛性。或名一眞法界。或菴摩羅識。大圓鏡智。性覺妙明。本覺明妙等皆是也。欲知三字分別顯性。請閱圓覺經講義釋題。

二釋佛華嚴

上三字直顯性德。此三字巧顯修德。全性德而起修德。不三而三。全修德卽是性德。三而不三。言性德既是離過絕非。豎窮橫徧。而修德亦一一無非離過絕非。豎窮橫徧也。先出三字名義。佛以就果得名。覺照爲義。覺則悟。大夜之重昏。照則朗。萬法之幽邃也。華以從喻得名。感嚴爲義。感是感果。萬行圓成故。嚴是嚴身。衆德悉備故。嚴以功用受稱。資莊爲義。資廣大之體用。莊眞應之佛身。上二字是因果別相。此嚴字是因果總相。因修萬行爲能嚴。果彰衆德爲所嚴。能嚴所嚴皆云嚴也。次釋三字廣義。大疏以十義釋佛。一法界義。謂性德眞常。十界依法法皆佛。是法身佛也。二本性義。指根本智。謂智光寂照。玄鑑無私。卽本具天真佛。成報身佛也。三涅槃義。涅槃名不生。槃名不滅。是依體受稱。疏主意以從用得名。謂從體起用。化用自在。化畢歸寂。



名涅槃佛。卽應身佛也。四隨樂義。謂樂是樂欲、指機感。隨是隨順、指聖應。所謂有求必應、無感不通。卽意生身佛也。五成正覺義。謂因圓果滿、道樹告成。卽菩提身也。六願義。謂稱性宏願、體周法界。卽願身也。七三昧義。三昧、云正定。定屬福德。由依大定、積福圓滿。卽福德身也。八業報義。謂報得相好、微妙難思。用嚴法身、由因善業。卽莊嚴身也。九住持義。謂安住覺道、持攝迷流。福澤四生、恩霑九界。卽力持身也。十心義。謂萬法由心轉回、威勢儀容映奪。卽威勢身也。上來十義。第一當大字。第二當方字。第三四合指廣字。第五當佛字。六七合指華字。第八當嚴字。第九當經字。前六字爲別題。經爲通題。若別若通、皆不離於一心之所回轉。故第十總包上九。可謂總標七字。十佛齊融。爲斯教主、示物等有、證必玄同也。華十亦義。一含實義。表於法界、含藏性德故。二光淨義。本智明顯、無不照了故。三微妙義。一一行門、皆同法界故。四適悅義。順物機宜、令生歡喜故。五引果義。行爲生因、結成正覺故。六端莊義。行與願俱、恰恰相等故。七無染義。行與定俱、處濁恆清故。八巧成義。所修德業、不作自成故。九芬馥義。衆德住持、流香彌遠故。十開敷義。衆行敷榮、心華燦爛故。此十義詮華。如次對前、爲十佛因。亦不離題之七字故。嚴亦十義。卽上十華、同嚴一佛。爲嚴不同、卽有十義。又此十華、如次嚴前十佛。卽是十義故。以華爲能

嚴佛爲所嚴。佛華爲別相。嚴爲總相。

二釋通名指經字也

經亦十義。一湧泉義。謂深入經藏、談吐不窮。如泉源混混、湧注不竭。故二出生義。謂得經幽旨、言論出生。從一生十、展轉資多。故三顯示義。顯理具三千。示事造三千。的是經中之奧義。故四繩墨義。謂楷正定邪。如木隨繩而正直。喻心隨教而離邪。故五貫穿義。教中事理、智斷行位、因果等、穿成一貫、不令零落。故六攝持義。謂攝持所化衆生、歸於本源。不令攀緣六塵、輪迴五道。故以上六義、依佛地論。七常義。萬古常規。故八法義。千葉同軌。此二義、是梁昭明太子所出。感法師。以此常法二義、解繩墨湧泉云。法則舉直以措枉、繩墨以譬之。常則汲引而無竭、湧泉以况之。九典義。謂妙理圓正、無偏邪。故十徑義。超出生死之徑路。故釋經名竟。

二釋人題

# 唐尉賓國三藏般若奉詔譯

譯者、易也。謂翻易梵土之文、譯爲中國之字也。天子宣令曰詔、奉遵也。奉詔猶云遵令。卽遵依

天子所勅令也。般若、是譯師之德號。梵云般若、華言智慧。譯師原名金剛智慧。意取從金剛心中所起之智慧。金剛以堅利爲義。言譯師以智利自、而能破惑證真。以慧利他、令他亦能破惑證真也。三藏、是顯譯師之才能。謂譯師之才能博通經律論三藏。故敢將梵筴東來。貢獻代宗聖主。普利中華也。罽賓、卽北天竺界。羯濕彌羅國之別名。唐言賤種。謂此國最初、係種族貧賤。原非王種之貴族也。此經梵筴、自唐代宗貞元十二年、六月五日起首翻譯。至十四年、二月二十四日、譯成進上也。

### 三釋品目

## 入不思議解脫境界普賢行願品

入證入也。有能有所。不思議境界爲所入。普賢行願爲能入。言不思議者、心言罔及故。問何法、心言罔及爲不思議。答卽解脫境界。解脫境界所以稱爲不思議者、具含四義、一事相境界無邊、故不思議。二理性境界深遠、故不思議。三理事無礙、故不思議。四以性融相、重重無盡、故不思議。言解脫、亦有二種。一作用解脫。謂作用自在、脫拘礙故。二離障解脫。謂用二智照離二障。

故。由於內體無障、故得外用無累。二義相成、總名解脫。境界亦二。一分劑境界。如國疆域、各有分劑。佛與普賢、德用分劑、無能及故。二所知境界。理境深遠、事境無邊。事理無礙、性相融通。唯佛與普賢、方究竟故。由於內證所知無邊之境、故能外用無有涯涘。二義相成、總名境界。卽於二境得二解脫。此二不二、故不思議。以上言所入也。言普賢行願者、夫行之與願。如鳥二翼、車二輪。闕一、卽不能翔空致遠。必須二翼完全、始可翔空。二輪具足、才能致遠。然普賢是人行願是法。此品以人法爲目。且人之爲法、俱堪稱爲普賢。約人而言、謂普賢行願故。約法而言、謂法界之善。爲普賢法故。言人普賢者有三。一道前普賢。指資糧加行二位。謂曲濟無遺曰普。位鄰亞聖曰賢。二道中普賢。卽登地以上位。謂德周法界曰普。至善調柔曰賢。三道後普賢。謂已證極果曰普。不捨因門曰賢。約義而言。謂已成佛竟、行德周備。自利已圓、上無求進。不捨悲願、唯務濟生。隱實德而現權形、示居因而號菩薩。卽觀音文殊等、皆是也。果無不極、因終不捨。若斯菩薩、均得稱普賢也。言法普賢者有二。一指體名普賢。謂妙體周徧曰普。隨緣成德曰賢。二約用名普賢。謂一切曰普。一切卽一曰賢。在一塵而廣大悉備、在萬有而獨立不移。其體如是。其用亦然。以上言能入也。能所契合、泯絕無寄。斯爲真入耳。品類也。佛說此經、在逝多林。卽

舍衛國祇樹給孤獨園。約時居第四。雖說在般若、義屬華嚴。故結集大士、歸第一時部類。故云大方廣佛華嚴經。入不思議解脫境界普賢行願品云爾。此一品有四十卷。今是最後一卷。普賢菩薩以十大願王。導引華藏海衆。往生極樂。故古人拾取淨土三經之下。爲淨土四經。時人多有作爲日課。深有見焉。釋名竟。

## 二顯體分三初明須顯體

名爲賓。體爲主。名是假名。體是實質。名爲體上之能詮。體爲名下之所詮。凡種種文字。無非名言。文字所依之理。卽體也。而一切文字名言。均須因文達理。因言得體。如因筌得魚。因指見月。若但逐名而不悟體。如捉蛇尾。反遭其螫。世尊所以常爲弟子說筏喻也。如云。未渡河者。須用筏。已到岸者。不須舟也。經教亦然。未悟心者。須用文字。已悟心者。一切名言。皆剩語也。如此經者。大方廣佛華嚴。是經名。普賢行願。是品目。乃至四十卷全文。一一無非能詮之文言。就茲言下。一一皆顯所詮之理體。得此體已。方能全性起修。以修合性。前之釋名一章。總詮三法。今之顯體一章。別在法身。宗章別在般若。用章別在解脫。教相分別總別。故於釋名之後。須先顯體也。體義有三。一者禮體義。體雖法身。必具二德。雖具二德。還屬法身。具二德。故非縱屬法身。故

非橫。不縱不橫。故成妙體。妙體貴極。諸法中尊。一切萬行之所歸趣。無量功德之所莊嚴。種種言辯之所詮顯。猶衆星拱北辰。羣流歸東海。故須以禮釋體。明是貴極之法。法身德也。二者體底義。謂悟此體者。窮萬法之源。到實相之底。故以底釋體。明是透徹之宗。般若德也。三者體達義。謂得此體者。會萬殊而不一。徧衆法而無遺。故以達釋體。明是無礙之用。解脫德也。綜此三義。爲一妙體。迷之則歷劫長淪。悟之則當下具足。經云。往昔由無智慧力。所造極惡五無間。此堪證明歷劫長淪也。又云。誦此普賢大願王。相好智慧咸圓滿。諸魔外道不能摧。堪爲三界所應供。此堪證明當下具足也。豈非名後先須顯體之明證乎。

## 二 明正出體

今所出之體。而非華嚴全部。乃出當品別行一卷之體也。名雖有異。體卽不殊。此品以一眞法界性具三千爲體。論云。一眞法界性。具足十法界。依正本圓融。生佛無殊致。意顯寂寥包博。虛曠沖深。總賅萬有。卽是一心。性絕有無。相非生滅。莫尋其始。甯見中邊。迷之則生死無窮。解之則廓爾大悟。諸佛證之。妙覺圓明。現成菩提。爲物開示。原無名詞。強號之爲一眞法界性具三千。經云。心佛及衆生。是三無差別。言無差別者。卽指此體也。此之妙體。性非染淨。徧能出生染

淨諸法。故曰性具三千。言三千者。假名一千。謂佛假名。乃至地獄假名。實法一千。謂佛五蘊。乃至地獄五蘊。國土一千。謂佛依報。乃至地獄依報。隨舉一名。隨拈一法。隨指一塵。無非法界。理事頓足。無欠無餘。言此假名。實法。國土。並云千者。須知吾人介爾一念心性。試觀一念起時。必落一界。一界卽具十界。十界互具。則成百界。如此百界。各具性相。乃至本末究竟等十如是。以百界論之。便成千如是矣。故曰介爾有心。三千具足。只此介爾極微劣心。三千性相。炳然頓具。非前非後。不減不增。何以故。一念體圓。名爲理具。隨起念時。卽名事造。所以念體念用。同名爲心。念體則冥乎理具。而理具還包事造。念用則成乎事造。而事造還含理具。故得事理兩重三千。皆卽一念心中圓具。如帝網珠。光光融攝。重重無盡。難議難思。故曰大哉眞體。不可得而思議者。其唯心性歟。

### 三 明決微疑

此品是華嚴經最後之一。原名入法界品。今譯爲入不思議解脫境界普賢行願品。既是華嚴。宜但用法界二字爲體。足矣。何須前添一眞。後加性具三千呢。以別行品。貴在願王。導歸極樂。而願王導歸。是此卷之妙宗。宗非體而不立。故於法界下加性具三千。意顯生佛之假名。五陰

之實法。淨土之依報。皆吾人心性本具之三千。俾修淨業人。而讀誦此經。庶幾不起外求之念。須知一眞法界。卽心性之異名爾。顯體竟。

### 三、明宗分二、初須明宗

前顯體、顯性德。今明宗、明修德。性屬於理、修屬於事。性修原自交成、理事由來不二。性假修顯、修藉性成。全性起修、故不二而二。全修在性、故二而不二。方之樑與柱、是屋之綱維。屋內空、是樑柱之所取。今以屋空喻體、樑柱喻宗。繇有樑柱、方得受用屋空。故次體之後、須明宗也。

### 二、正明宗

宗、趣也。乃修行之喉襟。會體之樞要。若行者不識宗趣。將何以領會不思議之妙體乎。故宗趣不可不知。此品以十大願王導歸極樂爲宗。經中十大行願。願繇性發。行從性起。一一行願。無非稱性之修德也。性德離過絕非、豎窮橫徧。是故十大願王。一一皆離過絕非、豎窮橫徧也。所以經中十願之文。前九大願。一一皆云盡法界、虛空界。第一願云。十方三世。一切佛刹。極微塵數。諸佛世尊等。第二願云。十方三世。一切刹土。所有極微。一一塵中。皆有一切世間極微塵數。佛。一一佛所。皆有菩薩海會圍繞等。此皆稱性之談也。所謂導歸極樂者。須知極樂世界。爲法



界土亦即稱性之淨土也。以稱性願王爲因，卽是以不生不滅爲本修，因以稱性極樂爲果。卽所謂然後圓成果地修證。私謂圓明法界性，不變能隨緣。聖凡與淨穢，皆依心變造。十大願王，繇心發也。極樂世界，唯心土也。導念佛人歸於淨土，歸唯心之淨土也。華嚴善財、華藏海衆，悉是登地大士。普賢尙以十大願王，導歸極樂。我何人斯，寧不愧煞。明宗竟。

#### 四論用

用是力用，亦名功德。如來以權實二智，鑑機施教爲功能。此經以拔衆生苦，與諸佛樂爲德用。須知庸凡與佛聖，迷悟雖有殊，我心與佛心，究竟無有二。佛聖果人也，成就三身四智，五眼六通。十力四無畏，十八不共法等，種種功德。庸凡因人也，具無量恆沙煩惱，造無量恆沙業繫，受無量恆沙生死。迷悟之相，猶若雲泥，而言無二者。據相則不二而二，約性則二卽不二。蓋佛是悟衆生心內之佛，衆生是迷佛心內之衆生。悟者，悟衆生本具性體、性量、性具也。迷者，迷諸佛所證性體、性量、性具也。心性之妙，豈受其迷。迷而不迷，斯言有在。是故衆生本具性體，卽諸佛法身。性量，卽報身。性具，卽應身。先德有言：諸佛心內衆生，塵塵極樂。衆生心內諸佛，念念證真。佛卽心，心卽佛。未舉念時，早已成就。纔舉心念，卽便圓成。所謂感應道交，冥通聖智，不其然乎。